



KEMENTERIAN PERDAGANGAN DALAM NEGERI
DAN HAL EHWAL PENGGUNA

TEKS UCAPAN

YB DATO SRI ALEXANDER NANTA LINGGI
MENTERI PERDAGANGAN DALAM NEGERI
DAN HAL EHWAL PENGGUNA

SEMPENA

SAMBUTAN JUBLI EMAS HARI PENGUAT KUASA KE 50

PADA

21 JULAI 2022 (KHAMIS)

TEMPAT

MAKTAB PENJARA MALAYSIA
KAJANG

TERIMA KASIH SAUDARA/SAUDARI PENGACARA MAJLIS

YB DATO' ROSOL BIN WAHID

TIMBALAN MENTERI PERDAGANGAN DALAM NEGERI
DAN HAL EHWAL PENGGUNA

YBHG. DATUK AZMAN BIN YUSOF

KETUA SETIAUSAHA KPDPNHEP

YBHG. DATUK ROZIAH BINTI ABUDIN

TKSU (PEMBANGUNAN PERDAGANGAN DALAM NEGERI)

YBHG. DATIN ROSZANINA BINTI WAHAB

TKSU (PENDAYAUPAYAAN PENGGUNA)

YBRS. TUAN AZMAN BIN ADAM

PENGARAH PENGUAT KUASA

KETUA-KETUA AGENSI, PENGARAH-PENGARAH NEGERI DAN
PEGAWAI-PEGAWAI KANAN KEMENTERIAN

PEGAWAI-PEGAWAI PENGUAT KUASA

WAKIL-WAKIL MEDIA

YANG BERBAHAGIA DATO'-DATO', DATIN-DATIN, TUAN-TUAN DAN
PUAN-PUAN

SALAM SEJAHTERA, SALAM KELUARGA MALAYSIA,

PENDAHULUAN

1. Pertama sekali, saya bersyukur kerana kita dapat sama-sama berhimpun pada pagi yang berbahagia ini bagi meraikan Majlis Jubli Emas Sambutan Hari Penguat Kuasa ke 50 pada tahun ini.
2. Tahun ini merupakan tahun ke ketiga saya diberikan mandat dan tanggungjawab untuk menerajui Kementerian ini sebagai Menteri Perdagangan Dalam Negeri dan Hal Ehwal Pengguna (KPDNHEP) bersama-sama dengan YB Timbalan Menteri bermula pada 10 Mac 2020, bagi mengerakkan perdagangan domestik utama yang berdaya saing, progresif dan mampan serta memperkasakan pengguna.
3. Sambutan Ulang Tahun Ke-50 Penguat Kuasa pada tahun ini yang bertemakan “**Komited Mendepani Cabaran**”, amat bertepatan dengan hasrat Kementerian untuk menjadikan fungsi dan perkhidmatan yang akan diberikan oleh penguatkuasaan KPDNHEP terus relevan dalam arus perdana demi memastikan inspirasi “kepimpinan atasan negara” serta ”hasrat rakyat” dapat kita realisasikan bersama.
4. Hari Penguat Kuasa disambut pada 17 April setiap tahun dan pada tahun ini genaplah 50 tahun usia Bahagian Penguat Kuasa. Bermula dari 12 orang anggota pada tahun 1972, kini keanggotaan Bahagian Penguat Kuasa sudah mencapai seramai 2,274 pegawai di seluruh negara. Bermula dari Akta Kawalan Harga 1946 dan Akta Kawalan Bekalan 1961, kini Bahagian Penguat Kuasa mempunyai 12 akta yang sedang dikuatkuasakan. Banyak transformasi yang sudah berlaku dalam tempoh 50 tahun ini. Namun, saya lihat semuanya telah berjaya diharungi dan hasilnya kita boleh lihat sendiri di depan mata

pada hari ini. Syabas saya ucapkan!

PARA HADIRIN YANG DIHORMATI SEKALIAN,

5. Pada kesempatan ini, izinkan saya untuk berkongsi secara ringkas berhubung **pencapaian tugas penguatkuasaan bagi tahun 2021**. Sepanjang tahun 2021, pelbagai operasi telah kita laksanakan yang memberi impak berganda kepada pertumbuhan perdagangan domestik dan perlindungan kepada pengguna dengan **memperkenalkan beberapa operasi khas** antaranya Ops Suri, Ops Ria, Ops Menu, Ops Catut, Ops Rantai dan pelbagai lagi ops yang dilaksanakan berdasarkan isu yang dihadapi. Hasil usaha dan kerjasama anggota yang bertugas tanpa mengira waktu, kesemua ops dan sasaran ditetapkan berjaya dicapai. Tahniah diucapkan.

4. Sebagai rekod, pada tahun 2021, sebanyak **864,973 premis** telah diperiksa di seluruh negara. Daripada jumlah pemeriksaan tersebut, sebanyak **10,586 kertas siasatan** telah dibuka atas pelbagai kesalahan dengan **nilai rampasan** sebanyak **RM36.15 juta**. Bagi tempoh yang sama **kompaun** yang dikenakan pula adalah sebanyak **RM6.24 juta** dan jumlah **denda** adalah sebanyak **RM1.66 juta**. Sementara itu sebanyak **27,328 aduan** telah diterima dan ke semua aduan tersebut telah disiasat dan penyelesaian aduan adalah 100%.

5. Bagi **pencapaian tahun 2022** pula, berdasarkan statistik sehingga Jun, sebanyak **489,567** premis telah diperiksa di seluruh negara. Daripada jumlah pemeriksaan tersebut, sebanyak **6,457 kertas siasatan** telah dibuka atas pelbagai kesalahan dengan **nilai rampasan** sebanyak **RM25.94 juta**. Bagi tempoh yang sama **kompaun** yang dikenakan pula

adalah sebanyak **RM3.33 juta** dan jumlah **denda** adalah sebanyak **RM167,530.00**. Sebanyak **6,706 aduan** telah diterima dan **89.61%** aduan berjaya diselesaikan.

HADIRIN YANG SAYA HORMATI SEKALIAN,

13. Sebagai tulang belakang kementerian, gerak kerja warga penguat kuasa juga perlu seiring dengan perkembangan teknologi. Perubahan platform dari analog kepada sistem digital amat penting dengan menjadikan data sebagai kekuatan baru kementerian.

14. Tidaklah keterlaluan untuk saya nyatakan di sini bahawa fungsi Bahagian Penguat Kuasa merupakan tunjang dan tulang belakang kepada Kementerian. Tambahan pula, anggota penguat kuasa merupakan warga yang paling ramai di KPDNHEP dan taat setia tuan-tuan dan puan-puan akan kekal hingga ke hujung persaraan memandangkan skim perkhidmatan pegawai penguat kuasa adalah "close service". KPDNHEP merupakan rumah tetap yang akan didiami oleh tuan-tuan dan puan-puan dari awal hinggalah ke akhir perkhidmatan. Semoga kita dapat meneruskan usaha untuk meningkatkan lagi prestasi kerja dan menyempurnakan amanah dan tanggungjawab dengan baik dan berkesan.

15. Sepanjang Tempoh Perintah Kawalan Pergerakan (PKP) dan Pelan Pemulihan Negara (PPN), Pegawai Penguat Kuasa KPDNHEP dipertanggungjawabkan untuk membantu MKN dan KKM membendung penularan Pandemik COVID-19 dengan menguatkuasakan Akta 342 yakni memastikan premis perniagaan borong dan runcit khasnya mematuhi SOP pematuhan PPN yang ditetapkan oleh kerajaan. Inilah

amanah, tanggungjawab dan pengorbanan yang perlu kita sumbangkan kepada negara. Peranan serta tanggungjawab pegawai dan anggota penguat kuasa sangat penting dalam memastikan bekalan barangan keperluan asas rakyat sentiasa mencukupi dan dijual pada harga yang berpatutan disamping memastikan peniaga tidak mengambil kesempatan untuk mengaut keuntungan dalam situasi sebegini.

PARA HADIRIN YANG DIHORMATI SEKALIAN

16. Sepertimana yang saya jelaskan pada hari pertama saya ditugaskan di KPDNHEP, saya ingin mengekalkan dasar sedia ada yang telah berfungsi dengan baik. Namun, saya ingin menekankan kepentingan berinovasi dan beradaptasi kepada keperluan semasa. Kita masih mempunyai banyak peluang untuk memperbaiki kekurangan dan memperkenalkan perubahan yang bermanfaat kepada negara dan rakyat.

17. Selaras dengan visi KPDNHEP untuk menjadi kementerian peneraju dalam merencanakan perdagangan domestik Negara, saya mempunyai harapan tinggi pada semua warga Kementerian terutama tuan-tuan dan puan-puan warga penguat kuasa untuk bersama-sama saya merealisasikan hasrat ini. Saya mahu agar warga penguat kuasa sentiasa bersemangat tinggi, sentiasa bersedia bertugas tanpa mengira masa dan keadaan, komited dan sentiasa bersedia untuk menggalas cabaran mendatang. Saya juga mahu *esprit de corps* yang ada dalam diri warga penguat kuasa sentiasa segar sepanjang masa. Tugas harus dilaksanakan secara komited, berintegriti dan adil.

18. Pada kesempatan ini, saya ingin mengingatkan tuan-tuan dan puan-puan supaya pertingkatkan integriti, jauhi rasuah dan elak

penyalahgunaan kuasa. Saya dan kepimpinan tertinggi KPDNHEP tidak akan berkompromi tentang salah laku integriti khususnya penyalahgunaan kuasa dan rasuah. Jika sesiapa didapati melakukan kesalahan, saya tegaskan di sini *“you are on your own, the law will take care of you”*.

19. Saya juga menyeru tuan-tuan dan puan-puan agar terus memupuk azam dan tekad mempertingkatkan usaha membawa imej penguat kuasa KPDNHEP ke persada yang dihormati lagi dikagumi. Demi aspirasi kepimpinan negara dan hasrat rakyat kepada kita, saya sentiasa bersedia berkhidmat bersama tuan-tuan dan puan-puan, mengangkat kredibiliti dan martabat penguat kuasa KPDNHEP sebagai sebuah pasukan penguatkuasaan yang terbaik di Malaysia.

20. Saya selaku Menteri amat berpuas hati dengan kerjasama serta komitmen yang tinggi dari semua warga kerja Bahagian Penguat Kuasa dalam membantu KPDNHEP merangka dasar dan strategi untuk kepentingan rakyat. Saya percaya sumbangan yang diberikan oleh tuan-tuan dan puan-puan diteruskan di masa hadapan.

21. Terlalu banyak jasa anggota Penguat Kuasa KPDNHEP yang tidak dapat saya nyatakan di sini. Pelbagai cabaran dan tohmahan yang terpaksa kita telan demi menjalankan tugas. Teringat saya pada kata-kata Pengarah Penguat Kuasa, Tuan Haji Azman ketika kami berbincang mengenai perkara ini suatu ketika dulu. ***“Tidak mengapa kami ditohmah, Tuhan tahu apa yang kita lakukan demi rakyat dan negara,”***. Kata-kata ini sesungguhnya memberikan kesan yang mendalam kepada saya secara peribadi.

22. Di kesempatan ini, saya ingin mengambil kesempatan untuk

membuat sedikit pengumuman istimewa di pentas ini. Mulai hari ini, jawatan Pengarah Penguat Kuasa akan ditukar kepada **KETUA PENGARAH PENGUAT KUASA KPDNHEP**. Jawatan Timbalan Pengarah juga akan ditukarkan kepada **Timbalan Ketua Pengarah Penguat Kuasa KPDNHEP**. Sesungguhnya pengiktrafan ini terlalu kecil untuk dibandingkan dengan jasa dan bakti pasukan Penguat Kuasa KPDNHEP.

PARA HADIRIN YANG DIHORMATI SEKALIAN

23. Sebelum saya mengakhiri ucapan, sekali lagi saya ingin mengucapkan terima kasih kepada YBhg. Datuk KSU dan YBr. Tuan Ketua Pengarah Penguat Kuasa khususnya dan seluruh warga penguat kuasa KPDNHEP yang sudi menjemput saya pada majlis yang penuh bermakna ini. Tidak dilupakan juga kepada tuan rumah pada tahun ini iaitu Maktab Penjara Malaysia, Kajang yang membenarkan Kementerian untuk menggunakan kemudahan sepanjang sesi latihan dan acara kemuncak Majlis Perbarisan Kawalan Kehormatan Sempena Sambutan Jubli Emas Ke 50 dan Latihan Kursus Asas Sains Penguatkuasaan Tahun 2022. Saya mewakili kementerian merakamkan setinggi-tinggi penghargaan dan ucapan terima kasih atas bantuan yang diberikan.

24. Marilah kita sama-sama meningkatkan azam, komitmen, disiplin dan dedikasi terhadap tugas dan tanggungjawab kita selaku penjawat awam khususnya pegawai-pegawai penguat kuasa kepada rakyat, kerajaan dan negara tercinta.

25. Selamat Menyambut Hari Penguat Kuasa Ke 50 Tahun 2022 kepada semua anggota penguat kuasa KPDNHEP di seluruh negara.

“KOMITED MENDEPANI CABARAN”
